



**NEW ZEALAND  
IMMIGRATION**



SOLOMON ISLANDS

# Get redi pak – Infomeisen blo oloketa RSE woka



**MINISTRY OF BUSINESS,  
INNOVATION & EMPLOYMENT**  
HĪKINA WHAKATUTUKI

[immigration.govt.nz](https://immigration.govt.nz)



**NEW ZEALAND  
IMMIGRATION**

---

# Kontents

---

<b>Welkam!</b>	<b>1</b>
<b>Indaksen</b>	<b>2</b>
<b>Selen</b>	<b>3</b>
<b>Releishenships</b>	<b>9</b>
<b>Emploement</b>	<b>12</b>
<b>Kondisens lo hao fo stap</b>	<b>15</b>
<b>Impotent infomeisen</b>	<b>18</b>
<b>Go lo Hom</b>	<b>20</b>
<b>Bifo iu liv – cheklist blo iu fo plein</b>	<b>21</b>
<b>Kontakt nambas</b>	<b>22</b>

---

# Welkam!

---

## **Welkam lo RSE New Zealand. Congradiuleisen nao lo siusim u fo bikam wanfala RSE woka!**

RSE hem minim Rekonaesim Sisonol Emploea. Rekonais sisonol emploia hem emploia wea imigreisen hem bin givim apruvol lo hem fo hem rikrutim oloketa wokas lo ovasis.

Hotikalsa (frut wetem vejitebols) an vitikalsa (waen) indastris lo New Zealand olketa save nidim extra wokas fo waka lo olketa ples ia samfala taems lo ia, saed lo helpem olketa fo plantim, grouim an havestim oloketa fruit and vejitebols.

Disfala infomeisen insaed lo pak ia bae hem helpem iu taem iu stap an waka lo New Zealand. Plis iu mas mek sua iu tekem disfala tok save ia wetem iu taem bae iu kam lo New Zealand and kipim wetem iu taem iu lo dea.

Bae iu sud attendim wanfala pri-dipasa orienteisen presenteisen bifo iu livim hom kantri. Disfala presenteisen ia bae hem talem iu gud aboutim how na fo waka an stap lo New Zealand ia bae hem laek. Bae iu save garem sans fo askem questens an getem ansas gud lo olketa samting wea iu no klia lo hem.

Taem bae iu araev lo New Zealand, bae emploea blo Ministri blo Bisnis, Inoveisen an Emploement bae hem garem moa samfala infomeisen lo han fo helpem iu setol lo New Zealand an lo niu waka blo iu.

Hem big fala opotiuniti an hem ap lo iu nao fo meke ius lo hem. Mifala wisim iu wel!

**Tim blo RSE lo New Zealand**

---

# Indaksen

---

Bifo iu travol go lo New Zealand, iu sud atendim wanfala pri-dipasa trening seson wetem lokol gavman ofisols blo iu. Diswan bae hem mekem iu andastandim moa aboutim laef lo New Zealand. Bae dat taem evri travol arenjment blo iu hem sud konfom finis tu. Taem bae iu araev lo New Zealand bae iu atendim wanfala indaksen wetem emploea blo iu moa. Tufala indaksens ia bae hem provaedim iu wetem iusful infomeisen lo saed lo:

- › Transpot arenjment blo iu lo New Zealand;
- › Saed lo wetha, an wat kaen kaleko na bae iu nidim;
- › Wat kaen fud na iu shud kaikaim fo kipim iu helti an fit;
- › Hao fo duim bajet – diswan hem abaotim hao na fo u iusim selen blo iu and manejim kosts taem iu lo New Zealand;
- › Tax wea bae iu peim lo selen wea iu onem taem iu lo New Zealand;
- › Wat na bae hapen sapos aksident hem kasem iu an iu no save kontiniu fo waka;
- › Wat na bae happen sapos iu siki;
- › Kontrasepsen, sef seks an seksual-transmited infeksens; an
- › Wat na iu save duim taem iu nomoa lo waka an hao na bae iu enjoem stei blo iu lo New Zealand.



---

# Selen

---

Iu mas mek sua iu garem inaf selen fo holem iu an kavarem expenses blo iu kasem lo fest pei de blo iu, taem iu kasem lo New Zealand.

## Pei blo iu

Selen blo iu bae hem go na lo wanfala New Zealand bank akaont. Emploea blo iu na bae hem helpem iu fo setim ap fo iu taem iu araev lo New Zealand. Bae iu risivim peislip evri wik, fo talem iu hao mas na olketa peim iu an wat na hem didakt lo pei blo iu.

Plis iu mas askem emploea sapos iu garem questen abaot infomeisen lo peislip blo iu.

Olsem wanfala sisnol woka, bae iu peid lo wanfala lo olketa weis ia:

### 1 Hourly reit

Sapos kontrak blo iu hem sei iu peid lo hourly reit, hem minim bae iu peid lo set amaont lo evri hour iu waka.

**FO EXAMPOL:** Sapos iu waka 30 hours an hourly reit blo iu hem NZ\$15.00 bae iu peid NZ\$450.00 BIFO tax didaksens. Tax wetem didaksens hem ridiusim pei blo iu.

**Bae iu no peid les dan minimam wej.**

### 2 Pis reit

Pis reit hem minim bae iu peid lo samfala kaen amaont evri taem iu finisim wanfala patikiula waka olsem. Fo exampol lo apol indastri bae iu peid lo set praes fo evri bin iu filim ap wetem apol. Hem minim, sapos iu waka fast nao lo chekim kualiti blo olketa apol ia, bae iu get peid mo ia.

**FO EXAMPOL:** Sapos iu peid lo NZ\$30.00 lo evri bin blo apols iu filim ap, an iu filim ap 15 bins lo end lo wik, bae iu peid nao lo \$NZ450.00 bifo tax an samfala didaksens.

Sapos iu peid lo pis reit, bae iu stil kanot bi peid les dan minimam hourly wej fo namba blo hour iu waka lo dat fala wik. Haoeva, bikos diswan hem opson nomoa mek aveilabol fo olketa expiriens wokas, bae u save mekem moa dan minimam wej ia.

Hem impotan tumas fo askim wat na reit hem peid finis wetha hem includim holide pei or hem peid antap lo reit. (Holide pei na hem talem andanit ia.)

### 3 Slaeding reits

Slaeding reits hem samfala taem hem pat blo pis or kontrak reits. Diswan ia taem iu get peid lo wanfala set amaont lo selen (valiu reit) hem folom na evri iunit lo waka iu finisim. Diswan hem save peid na folom bin, or basket, or tri, or bei, or kilogram. Hem depend nomoa lo wat na waka ia an lo wat kaen iunit na hem peid lo hem. Iedia blo slaeding reit ia hem samfala taem bae iu save garem pei lo evri task iu duim ia (hem iunit reit) hem no fiks reit and hem save chenj dipend nomoa lo hao na tings hem go.

**FO EXAMPOL:** Sapos iu duim nao apol havesting an olketa peim iu lo namba blo olketa bins iu filim ap, den bae praes blo bin bae hem depend nao lo olketa faktos olsem hao big nao krop ia, hao old nao tri ia, varaeti blo apol iu pikim ia, taem iu havestim, wetha hem fo expot or fo lokol New Zealand maket or fo usim fo prodaksen fo apol jus. Hem minim bae iu get peid lo NZ\$15.00 lo ich bin blo apol fo jus an iumi sei NZ\$45.00 nao lo bin fo expot kualiti oganic apols.

Emploea blo iu hem mas diteilim na agriment blo iu dat reit hem NZ\$15.00 na lo wanfala bin (loues posibol dola valiu) kasem NZ\$45.00 (haies dola valiu) lo wanfala bin, an hem mas talem gud wae na lo dea praes hem didiferent. Emploea hem save olwes pei nao lo abav top reit bat hem no save pei lo bilou minimam reit.

Sapos iu peid lo slaeding reits, bae iu stil no save peid lo les dan minimam hourly wej. Haoeva, diswan hem opson nomoa ia, hem jenroli mekem ap fo olketa expiriens wokas, bat bae iu save mekem moa dan minimam wej.

Hem impotan tumas sapos iu save askem if reit ia hem inkludim pei blo holide or if datwan hem peid antap lo reit ia. (Toksav blo Holide pei nao lo andanit.)



#### 4 Kombaeneisen reits

Lo samfala keis bae iu save chenjim reits. Hem save hapen sapos taep blo waka iu duim hem chenj. Fo exampol, samfala taem sapos iu niu lo job iu save stat lo hourly reit, den save chenj go lo pis reit taem bae iu garem moa an moa expiriens lo waka an iu save waka kuiktaem tumas.

Bae iu save peid diferen tu from narafala waka man sapos iu duim diferen waka or bae iu save peid lo diferen wei.

#### ■ Holide pei

Iu entaetol na lo holide pei lo set reit. Fo exampol, sapos holide pei hem 8% an sapos iu enim \$500 lo wanfala wik, bae iu save garem adisonol \$40.00 nao lo wanfala wik set asaed olsem holide pei. Bae iu peim tax tu lo holide pei blo iu ia. Samfala emploea olketa save inkludim holide pei nao lo wikli pei blo iu ia, an samfala bae olketa peim noma lo end blo waka blo iu ia nao. Sapos holide pei blo iu hem peid wikli, den tax hem otomatikli tekem aot finis nao lo pat blo wej blo iu, bat sapos holide pei ia hem peid nao lo end lo waka blo iu den, tax ia bae olketa jas tekem aot dat taem tu ia.

**Sapos iu garem toktok bihaenim peislip blo iu, or iu ting samting hem no stret lo pei blo iu, iu save kontaktim grup lida or emploea blo iu.**

## Didaksens lo pei blo iu

Amaont wea iu enim hem no faenol amaont ia lu garem pei bikos bae iu garem didaksens dat bae olketa tekem aot daerekli nao lo pei blo iu.

### ■ Tax

Tax or Pay as You Earn (PAYE) hem wanfala kompalsari didaksen – iu mas peim nao diswan. Tax ia hem selen from pei blo iu wea hem go nao lo gavman blo New Zealand fo peim na olketa isensol sevis olsem pablik rod and samfala samting lo saed lo sefti. Evriwan waka lo New Zealand olketa evriwan pei tax ia. RSE wokas olketa garem spesol tax code (NSW). Bae iu lukim lo peislip blo iu.

Bikos iu lo loues tax reit, samtaems iu no nid fo filim ap end lo yea tax rifand fom nomoa bikos bae iu no entaetol nao fo rifand. Bat sapos iu enim plenty selen tumas nao taem iu waka den bae iu save end ap owim big fala tax tumas nao lo gavman taem bae iu submitim fom. Iu mas tok wetem empolea blo iu sapos iu garem kuestens.

### ■ Volantri didaksens

Iu save mekem volantri didaksen lo pei blo iu, wetem riten apruvol blo iu. Olketa didaksen ia hem samtaems fo kavarem na olketa kost blo transpot blo iu fo go an cam baek lo waka wetem ples blo iu fo silip. Iu alaom bos blo iu fo aotim olketa kost ia from pei blo iu, bae hem mekem tings hem isia fo iu luk aftam na selen blo iu.

Emploea blo iu hem mas expleinim gud lo iu wat na bae iu garem pei lo hem, an wat nao payslip blo iu, eni didaksens dat bae hem mekem, an hem mas getem apruvol blo iu fastaem lo olketa samting ia. Iu save stopem olketa didaksens ia lo enitaem.

Sapos iu duim olketa samting ia, bae iu stil peim iet eniting iu owim an bae iu stil peim kontiniu sevises ia lo cash or from bank akaont blo iu.

Saed lo proteksen blo iu, evri didaksens mas shoum na lo Ministry blo Bisnis, Inoveisen and Emploement Leiba Inspektas, olketa wea bae chekim dat tings ia hem stret an hem folom law.



## ■ Travol kost didaksens

Emploea blo iu wetem iu, iutufala searem nao semsem kost lo eafea blo iu lo hom kantri blo iu fo kasem lo New Zealand (sapos iu from Kiribati or Tuvalu, diswan bae hem haf blo riten eafea from Fiji). Sapos emploea blo iu hem peim ful fea blo iu, bae iu nid fo peim baek lo emploea blo iu haf blo fea wea iu sapos fo peim. Diswan ia nao wea bos blo iu bae hem didaktim na selen ia from pei blo iu ia. Luk olsem bae iu mas peim own travol kosts blo iu seleva lo New Zealand tu ia. Olketa samting ia hem inkludim tings olsem eafeas, bas feas an trein feas.

## ■ Didaksen lo saed lo haos fo stap

Emploea blo iu mas provaedim seif an gud ples fo iu stap lo fea New Zealand praes. Haos ia olketa lo Ministry of Business, Innovation and Employment mas chekim gud finis nao. Hem ap lo iu na fo iu agri lo bos blo iu fo didaktim selen blo iu fo haos rent ia, or iu seleva save daerektli peim go.

## ■ Paoa wetem samfala living kosts

Bae iu expekt fo peim own paoa an samfala living kosts olsem pat lo living blo iu lo ples. Bae iu also rekuia fo peim samfala kosts lo transpot blo iu fo travol go an baek lo waka. Iu save talem olketa fo didaktim from pei blo iu or iu save peim go daerek seleva. Samfala emploea save inkludim paoa lo rent blo haos blo iu. Iu askem bos blo iu what nao hem inkluded finis an wat na nomoa iet dat iu hav tu peim seperetli.

Afta evri didaksen ia, bae iu garem nao left ova amaont ia lo bank akaont blo iu. Wat iu duim lo diswan hem impotan tumas!

## Olketa samting fo iu tingim

**PEI WETEM DIDAKSENS:** Reit blo iu lo wanfala hour bae luk olsem staka tumas ia bat didaksens lo dea tu ia, an sapos iu no keaful wetem rest lo selen blo iu, bae iu no go baek lo hom wetem plenti selen nomoa ia.

**EXPERIENS:** Festaem wokas lo New Zealand bae olketa no garem plenti selen olsem olketa man wea olketa bin waka finis lo New Zealand bifo, wea olketa save gud finis lo waka blo olketa, an olketa lanem finis na hao nao fo iusim gud selen blo olketa.

# Seivings wetem rimitenses

## ■ Seivings

Sapos iu laek sevim plenti selen taem iu stap lo New Zealand, iu mas strong nao. Lo dea staka samting tumas nao save temtim iu fo iu save spendim selen blo iu lo hem!

Bos blo iu hem save helpem iu fo sevim samfala selen blo iu lo saed lo otomatikli putim samfala selen awe fo iu lo seperet bank akaont and bae hem save helpem iu fo iu garem inaf selen lo olketa living expensis blo iu. Diswan iu mas givim riten apruvol lo hem. Iu tok wetem bos blo iu sapos iu laekim disfala tingting ia.

## ■ Rimitensis (sendim selen go lo hom)

Lelebet fee, den bae iu save sendim selen lo hom. Bank blo iu wea iu bank lo hem bae hem save helpem iu. Bat iu save iusim samfala banks or samfala bisnisis tu fo iu save sendim selen. Diferent bank an diferent bisnisis olketa garem diferent chajes. Chajes ia hem diferent, hem dipend nao lo amaont lo selen wea iu laek sendim, lo wat kaen kantri iu sendim go an hao kuik nao selen ia bae hem transfa. Bos blo iu bae hem save talem iu gud wat na olketa samting ia, mekem hem save helpem iu fo mekem gud choes.

Hem expensiv tumas sapos iu laek sendim selen olowe lo hom, bikos kosts na hem atach lo evri transaksen iu duim ia. Iu save tok wetem bos blo iu fo hem save talem iu wat na best wei fo sendim selen lo hom, or iu save visitim website **[www.sendmoneypacific.org](http://www.sendmoneypacific.org)**. Fo duim diswan, bae iu nid fo iusim computer or smartphone fo iu save aksesim internet. Askem bos blo iu hao an wea nao iu save aksesim internet.

---

# Releishenships

---

## ■ Wanem iu duim fo employea blo iu

Bae olketa expektim iu fo duim nao evri waka wea iu saenim pepa wetem employea blo iu ia, an fo duim lo wei wea bos blo iu hem laekeim iu fo duim. Diswan bae hem inkludim:

- › Kam lo waka folom taem;
- › Luk aftarem gud ples wea iu stap; an
- › Iu mas bihev gud olowe, both lo waka an afta waka.

Olketa bae expektim iu fo waka nomata hem Sabbath or samfala holide. Olketa hours lo saed lo waka blo iu bae hem set aot na lo emploement agriment blo iu ia.

Bae iu faendim tu dat aotsaed wok hem save depend na lo wetha an bae iu faedim dat samfala taem bae iu faedim dat staka deis bae nomoa waka.

Tim wok hem impotent tumas, so iu mas tok wetem tim lida or bos blo iu abaotim tings that iu nidim. Hem gud fala tingting sapos iu lukluk an lisin lo fest fiu wiks fo iu getem aedia wat na olketa expectim fo iu duim. Bae hem save tekem iu a fiu kapol lo wiks fo iu setol in.

## ■ Afta waka

Wat iu duim afta waka bae hem pleim big fala pat nao lo saed lo mekem iu hapi lo stei blo iu lo New Zealand. Tok wetem employea blo iu abaotim aktivitis wea iu save duim taem iu no waka. Lo dea lokol sios and spots grups wea iu save joenim olketa, an samfala komiuniti aktivitis wea iu save joenim olketa hem stap. Bae hem sans fo iu save mitim tu samfala RSE wokas lo nara kantri an New Zealanders.

Bae iu mas obeim tu law blo New Zealand. Sapos iu brekem law, New Zealand Police bae hem involv na ia, an bae iu lusim job blo iu. Sapos iu finis lo waka blo iu, bae iu no save stap lo New Zealand bae iu hav tu reten lo home nao.



## ■ **Wat na empolea blo iu save duim fo iu**

Bisaed lo peim iu lo waka blo iu, empolea blo iu hem save tek kea lo samfala tings fo iu. Diswan hem inkludim:

- › Faedem gud fala ples fo iu stap;
- › Peim iu at lis lo New Zealand minim wej lo wan hour;
- › Provaedim iu wetem samfala namba lo hours fo waka; an
- › Provaedim iu wetem transpot fo go an cam baek lo waka saet.

Emploea blo iu bae hem mas also nid fo provaedim iu wetem pastorol kea. Pastorol kea ia hem abaot hao fo luk aftarem na wel-bing blo iu taem iu stap lo New Zealand. Everi empoleas requea fo helpem iu faendem sevises an komiuniti grups dat bae hem save helpem iu lo saed lo helth isus blo u, shopping, spot an atendim sios.

Evri RSE empolea hem mas apruvd bae New Zealand gavman fo mek sua olketa suitabol empoleas wea olketa save provaedim nesesari wok an gud wok kondisens. Empoleas blo iu hem mas mitim na evri living an sefti requaiamens wea olketa putim ap fo protektim olketa RSE wokus.

**Emploeas laekem iu fo go lo olketa sapos iu garem problem. Iu no shem fo aprochim olketa!**

## ■ Solvim problem lo wok

Sapos iu garem problem or samfala samting wea iu no andastandim or filim denja or anfea, fest ting wea iu save duim nao iu askem tim lida or bos blo iu abaoitim. You save duim olketa samting ia seleva or askim grup lida fo duim fo iu. Diswan hem samtaems hem gud fala wei fo sotim tings aot, kliarem ap eni misandastandings an setolim samfala problems.

Sapos iu no hapi wetem ansa blo bos, iu sud kontaktim olketa lo Leiba Inspektoret. Olketa Leiba Inspecto ia olketa gavman ofisa ia wea olketa lo dea fo meke sua dat evri emploea mitim nao seten kondisens fo haareem iu.

Iu save kontaktim tu lketa lo union. Olketa lo union ia olketa lo dea fo ripresentim na raets blo olketa wokas lo New Zealand. Luk olsem olketa garem wanfala lokol ripresentativ or memba wea hem save help.

Sapos wanfala problem hem kam ap, iu shud talem samwan quiktaem. Iu save kontaktim:

- Group lida blo iu or bos blo iu;
- Gavman representativ blo iu;
- Leba Inspecta; or
- Union blo iu, sapos iu wanfala memba.

Samfala oganaeseisens wea iu save kontaktim fo help hem inkludim:

- Sitizen's Advaes Biuro
- Komiuniti grups
- Fri Law sevis
- Setolment Sapot Sevis

List blo kontakt nambas hem provaeded nao lo end blo disfala buklet ia. Emploea blo iu bae hem save provaedim tu wanfala lokol list blo contacts.

---

# Emploement

---

## ■ Emploement agriment

Bae iu risivim wanfala riten emploement agriment olsem pat lo ofa lo wok blo iu. Emploea blo iu or ejent blo olketa bae olketa save explenim agriment ia lo iu.

Evri wakaman lo New Zealand olketa mas garem na disfala riten emploement agriment ia. Diswan hem impotent pepa tumas wea hem talem gud nao olketa samting wea fo iu duim fo emploea blo iu an wat emploea blo iu mas duim fo iu.

Agriment blo iu bae hem setim aot nao samfala kondisens dat hem lo Law blo New Zealand. Hem mas inkludim nao anuol liv provisions, holide pei, waka lo pablik holides an sik liv.

Iu sud not saenim emploement agriment antil iu andastandim evriting insaed an iu hapi wetem olketa tems an kondisens insaed bifo iu save saenim agriment ia. Sapos iu no andastandim eniting or iu no sua abaotim eniting, askem olketa gavman ofisols, emploea or ejent blo olketa fo explenim.

## ■ Wok-rileted injuris

Sapos iu havem aksident, iu save aplae tru lo docta blo Faenansol asistens blo Accident Compensation Corporation (ACC). Bae iu save peid lo ACC levi olsem pat lo tax blo iu. Gavman blo New Zealand nao hem ranem ACC an hem provaedim insuarans fo sam pesonol injuris. Hem dipend nomoa lo hao na injuri blo iu hem hapen, ACC save helpem iu lo medical tritment blo iu afta lo aksident.

Hem impotent tumas sapos iu save letem ACC quiktaem taem aksident kasem iu nogud ACC no save kavarem olketa expenses ia.

Expenses ia hem inkludim nao meresin, spesol sejeri or tritment fo aksident or injuris, bat no inkludim nao enikaen siki olsem flu. Olketa kost ia hem kavarem nao lo medikol insuarans blo iu.

## ■ Olketa siki wea hem no rileded lo waka

Medikol insuarans hem kompolsari fo evri wokas blo RSE. Diswan hem fo kavarem nao eni kost lo eni helth rileded-siki dat hem kasem iu taem iu stap lo New Zealand. ACC hem no no kavarem olketa ilnes.

Emploea blo iu bae hem arenjim nao medikol insuarans blo iu as pat lo visa proses blo iu. Kost blo diswan bae hem didaktim nao lo pei blo iu, taem iu stat wok. Bae iu mas peim nao medikol insuarans blo iu seleva nomata iu no kleimim eniting.

Medikol insuarans hem save kavarem nao expenses olsem visit go lo olketa dokta; kost blo meresin wea dokta bae hem givim (priskripson), imejensi dentol tritment, an inkludim kost blo hospital sejeri. Sapos iu garem sirias siki or disabiliti an iu nid fo go baek lo hom bikos iu siki, medikol insuarans hem save kavarem olketa kosts ia tu ia. Sapos iu olredi bin trited fo siki taem iu lo hom yet or iu bin siki finis even bifo iu kasem New Zealand, medikol insuarans bae hem no save kavarem kost blo tritment ia. Olketa siki ia olketa kolek pri-egsisting kondisens or siki wea hem stap kam wetem iu finis nao. Bae iu mas tokabaotim wetem emploea or rikrutment ejent blo iu taem olketa arenjim medikol insuarans blo iu.

Emploea blo iu bae hem provaedim iu wetem infomeisen lo medikol insuarans kavrej blo iu. Mek sua noma iu ridim infomeisen ia or askim emploea blo iu fo hem explenim gud moa wat nao insuarans ia hem save kavarem an wat nao iu save alaod fo kleim lo hem.

## ■ Visa blo iu

Bae iu save enta lo New Zealand lo wan fala lelebet taem visa noma dat hem save alaom iu fo waka anda lo RSE skim. Lo visa blo iu ia bae olketa listim tu olketa kondisens fo waka lo New Zealand, wea hem inkludim tu hu nao emploea blo iu and wat kaen pat lo New Zealand nao bae iu waka lo hem. Taem bae iu lo New Zealand bae iu no save aplae nao fo enikaen taep imigreisen visa. Sapos iu chus fo livim emploea blo iu, bae olketa no save alouim iu fo stap lo New Zealand.

Iu mas go baek lo hom nao afta end lo waka blo iu. Sapos iu no save folom kondisens lo visa blo iu an iu ova stei lo New Zealand, bae iu no save kam baek lo New Zealand lo fuisa.

Sapos iu folom gud nao kondisens lo visa blo iu an olketa RSE emploea givim iu samfala waka moa, bae iu save kam baek lo New Zealand lo nara sions lo fiusa. Bikos bae dat taem iu livim New Zealand visa blo iu hem expaea finis, sapos iu kam baek fo waka lo nara sison, bae iu hav tu aplae moa fo niu visa.

### ■ Joent Apruval tu Rikrut (ATR)

Joent Apruval tu Rikrut (ATR) hem alaom olketa emploeaes fo garem akses lo evri wakaman taem blo pik wok periods taem ia bae olketa save searem nao olketa wokman wetem nara emploea. Disfala joen ATR ia bae hem save mekem iu save gerem wok lo tu fala or plenti emploea an bae hem save mekem iu stap long taem lo New Zealand an iu save enim moa selen. Olketa emploea risponsibol ia bae olketa save oganaesim wok agriment blo iu wea hem inkludim nao arenjment fo travol blo iu an ples wea bae iu stap. Iu no fogetem fo saenim tufala agriments ia.





---

# Kondisens lo hao fo stap

---

## ■ Wetha

Pripearem iu seleva lo wetha bae hem diferent tumas lo ples blo iu. Wetha lo New Zealand hem kol tumas ia. Bae iu nid fo wok lo aotsaed lo samfala veri kol tempresas. Olketa manth hem kol tumas nao June, July, August an September, taem blo winta lo New Zealand na ia.

Bae iu nid fo garem olketa shu, an kalico olsem hem fitim winta nao fo hem save kipim iu wom taem iu waka. Emploea blo iu bae hem save provaedim iu wetem samfala blankets and samfala wom kavas fo bed blo iu. Emploea blo iu bae hem save advaesim iu tu lo wat an wea nao fo baem extra kaliko an blanket sapos iu nidim olketa. Bae olketa provaedim iu wetem hitas fo womim ap haos blo iu. Emploea blo iu bae hem save talem iu hao nao fo iusim olketa samting ia. Havem wom shaoa bifo an afta wok bae hem save help fo womim iu an kipim iu helti.

## ■ Haos

Bae iu save chek wetem emploea blo iu or RSE ejent or ripresentetiv blo iu lo wat haos nao hem provaeded, an wat nao hem provaeded insaed lo haos ia. Olketa emploea olketa andastandim dat iu had fo bringim big fala tings ia, so bed hem olketa saplaem an iu mas iusim nao bed ia. Bat ating samfala samtings iu save bringim from hom fo mekem iu seleva save fil gud go moa.

Olketa samting fo kuki lo hem, wasing masins an hot shaoas hem stap fo iu usim. Sapos iu lane hao fo iusim olketa samting ia bae hem save sevim iu taem an efot blo iu.

Hem waka blo iu nao fo luk aftarem haos blo iu seleva an kipim klin an taedi. Sapos iu kosim damej, bae iu hav tu pei fo hem, an bae hem expensiv.

## ■ Kaikai

Iu nid fo peim on fud blo iu seleva. New Zealand supamakets an shops olketa selem enikaen taep fud nomoa.

Hem impotent tumas fo kaikai olowe. Tri fala mils lo dei hem shud givim iu enaf streng an eneji wea iu nidim fo waka. Bae iu nid fo kaikai moa fud dan iu save kaikaim lo hom, bikos waka wea bae iu duim bae hem nidim staka eneji. Iu no trae fo kaikai smol or misim lanch an iu mas drinkim plenti wata.

Sapos iu no kaikai gud or drink inaf wata, bae iu les prodaktiv an bae iu onim les selen. Sapos iu no luk aftam iu seleva tu, bae iu save siki an iu no save waka an bae iu save go baek lo hom. Tingim nomoa, sapos iu no waka noma pei.

Arenjment lo kaikai bos blo iu nao bae hem sud mekem. Evri diferent wakaples hem diferent wei nao lo saed lo oganaesim fud fo olketa wokas blo olketa. Sapos iu garem konsen lo kaikai arenjment blo iu, plis iu tok wetem bos blo iu.



## ■ Stap helti

Wetha wetem woking kondisen lo New Zealand bae hem had lo helth blo iu. Kip wom, waswas olowe an wearem klin kaliko bae hem helpem iu.

Iu nid fo mek sua iu garem inaf slip an iu fit fo waka lo mone.

Hem gud sapos iu save wash olowe fo washim off nao olketa deti wea hem save kosim infeksi lo eni kats lo bodi blo iu. Iusim antibakterol sop nao hem best wei fo avoidim skin infeksi olsem boils. Askem bos blo iu sapos iu laekem help fo baem olketa samting ia.

Narafala impotent taep blo helth lo dea tu ia – wel-bing blo iu. Bae iu rialaesim tu dat iu misim famili an hom blo iu tumas. Kim kontak wetem olketa an sendim selen go lo hom olsem nao samfala wei fo kip intach wetem olketa. Emploea blo iu hem save faendim chipest weis fo iu save kontaktim famili blo iu, an hao fo iusim imeil an fon cads.

Stap strong nomoa an tingim nomoa dat taem ia bae hem pas quiktaem nomoa ia. Trastim iu seleva nomoa lo wat nao iu sapos fo kam duim an gohet fo waka had nomoa.

Sapos iu no fil hapi and iu garem samfala wari, iu tok wetem grup lida, bos or gavman blo iu.

## ■ Seksol helth

Iu mas save dat seksol-transmitted infeksi (STIs), inkludim HIV/AIDS, olketa garem lo New Zealand. Fo protektim helth blo iu, hem rekomended nomoa sapos iu no teke pat lo sex hem no sef an iu mas usim condom olowe. Famili planing sesons hem stap nao lo olketa lokol dokta.

Sapos iu tek pat lo seksol rileisonsip, iu mas mek sua lo iu seleva an nara peson ia iutufala evriwan mas save nao lo olketa sitiueson ia an agri fo klos kontakt.

---

# Impotent infomeisen

---

## ■ Disiplinari prosijas

Olketa samting ia hem mas resalt blo wokples raao or kriminol ofending. Emploement-rileted mata hem samting blo waka, and kriminol ofending hem sapos iu brekim law blo New Zealand.

## ■ Finis lo waka

Sapos iu saki lo waka blo iu, bae iu no save stei lo New Zealand. Sapos iu meke trabol lo law blo New Zealand, waka blo iu bae hem save finis, an iu mas livim New Zealand.

## ■ Dipoteisin

Sapos iu komitim kraem or iu feil fo stik wetem kondisen blo visa blo iu (olsem iu abandonem waka blo iu or iu ovastei lo visa blo iu), bae iu save livim New Zealand or bae olketa save dipotim iu. Lo olketa kaen samting ia, imigreisen lo New Zealand bae hem sendim iu wanfala dipoteisin laeabiliti notis an/or wanfala dipoteisen oda.

Sapos iu sev wetem dipoteisen oda, bae olketa laekim iu mas livim New Zealand quiktaem nao. Sapos iu no liv quiktaem, bae imigreisen lo New Zealand bae diteinim iu an dipotim iu. Sapos iu dipoted, bae olketa save banim iu fo kam baek lo New Zealand fo faev ias. Disfala samting ia hem save afektim sans blo iu fo aplae anda RSE skim lo fiusa. Bae iu hav tu peim baek nao kosts wea hem asosiet wetem dipoteisen blo iu. Fo dipot from New Zealand hem save stopem visit or waka blo iu lo New Zealand an samfala kantri.

**Plis iu mas save dat iu mas livim New Zealand bifo visa blo iu hem expae or bae iu riskim iu seleva lo dipoted.**

## ■ Drag wetem alkohol

Ligol ej fo drink alkohol lo New Zealand hem 18 ias. Samfala taons olketa garem ruls wea olketa save stopem iu fo drinkim alkohol lo pablik erias olsem paks, gadens an pablik car paks. Smok lo pablik erias hem no pemited. Diswan hem inkludim shopping mols, pabs, bas an restorants, plains, bases an treins. Drags an alkohols no save alao lo evri ples blo waka. Sapos iu garem questen lo olketa samting ia, plis iu mast tok wetem bos blo iu.

Iu mas no garem eni iligol drags nomoa nao wetem iu or eniting wea hem kolsap lo olketa samting ia. Sapos olketa faendim iu wetem olketa iligol drags ia or eniting olsem, bae olketa dil wetem iu lo emploeas disaplinari prosijas. Diswan wan hem save lid go lo saki blo iu folom waka blo iu bae nomoa eni woning stret.

## ■ Draeving lo New Zealand

Iu no alao fo draev lo New Zealand widaotim laesens. Sapos iu garem laesens an iu save draev lo New Zealand, iu mas tingim olowe fo draev lo left han saed lo rod. Lo staka mein rods lo New Zealand spid limit hem 100km/h anles saen hem sei loua spid hem aplae. Lo taons, spid limit hem save 50km/h anles saen hem sei narawe.

Iu sud not draevim vehikol blo olketa bos blo iu anles iu garem pemison from olketa.



## ■ Wat iu save duim taem blo imejensi

Save wat fo duim taem blo imejensi hem impotent tumas. Emplouas blo iu hem shud garem plan fo dil wetem enikaen taep blo imejensi. Imejensi samfala taem olketa kolek injuri incident, sivia siki, faea, ethquek, flad or stom, faet or samfala sirias incident. Iu askim bos blo iu taem blo indaksen fo infomeisen abaot wat nao fo duim taem blo imejensi.

---

# Go lo Hom

---

Bae iu livim New Zealand lo end lo waka blo iu wetem RSE emplouea. Sapos iu baem samfala samting fo tekem go lo hom wetem iu lo plein, iu mas tingim dat sapos iu tek moa dan ealaen weit alaoens blo iu, bae iu hav tu peim nao extra weit ia.

Trae fo planim fo sendim olketa samting ia lo hom eli. Tok wetem bos blo iu aboutim olketa freit dils ia dat wan bae hem save helpem iu fo iu save sendem guds blo iu lo hom wetem gud kost. Selen wea iu seivim lo freit bae iu save garem moa selen lo poket blo iu.

Iu mas tingim fo kipim New Zealand IRD tax namba blo iu an New Zealand bank akaont namba blo iu. Bae iu nidim olketa samting ia taem bae iu kam baek moa lo New Zealand anda RSE lo fiusa. Sapos iu laek kipim New Zealand bank akaont blo iu open, bae iu nid fo livim inaf selen insaed fo kavarem olketa bank fis. Iu sud kipim tu olketa wom kaliko wea iu peim lo New Zealand ia.

Fo getem aot plenti lo olketa expiriens blo iu lo RSE, iu save tok wetem gavman ripresentativ blo iu abaotim faenansol litresi or samfala training opotiunitis.

---

# Bifo iu liv – checlist blo iu fo plein

---

Bae olketa givim iu impotent pepa dat bae iu nidim fo iu enta an waka lo New Zealand. Iu mas kipim gud olketa impotent pepa ia an tekem kam wetem iu.

## Checlist

- Paspot wetem New Zealand visa
- Plein tikets
- Emploement agriment
- Medikol insuarans pepas
- Draevas laesens (sapos iu garem wan)
- Selen fo holem iu taem bifo iu tekem pei blo iu
- List blo olketa kontak nambas lo hom
- New Zealand IRD tax namba (sapos iu garem wan)
- New Zealand bank akaont namba an ATM kad (sapos iu garem wan)

**Plis iu mas mek sua dat nem an deit blo taem iu born lo plein tiket an olketa insuarans pepas blo iu hem mas spel semsem olsem nem blo iu lo paspot.** Sapos olketa no semsem u mas kontaktim rikrutment ejent or emploea blo iu quiktaem.

---

# Kontakt nambas

---

**Leiba Inspektoret**

0800 20 90 20

**RSE lo Ministri blo Bisnis, Inoveisen an Emploement  
(Imigreisen New Zealand)**

0508 55 88 55

**Helthlaen**

0800 611 116

**Setolment Sapot New Zealand**

0800 776 948

**Sitzen Advaes Biuro**

0800 367 222

**New Zealand Kansol blo Tred Iunions**

0800 698 646

**Imejensis: Polis, Faea, Ambulans**

111







